

En memoria da

30.5.1978

## Clementina Seiler-Berther, Romanshorn/Sedrun

nr. 43

(Corr.) La sonda dils 20 da matg havein nus fatg survetsch divin a Sedrun, sere-gurdond en pietad d'ina preziada e nobla convischina da Tujetsch, morta ad Uttwil/Romanshorn alla riva dil bi lag da Constanza. La sonda dils 29 d'avrel ha la respectabla convischina surdau si'olma al Segner, il patrun e signur dil tschiele e dalla tiara. Dunna Clementina Seiler-Berther ei ina personalitat che mereta menziun particulara. El temps che la buna e cara defuncta ha viviu en Tujetsch, numnavan ins ella semplamein la «Tina dalla Cruna».

La buna Tina ei naschida a Sedrun ils 26 da settember igl onn 1900 sco 7avel affon da 9 dils stimai ustiers e hoteliers Placi Berther ed Eleonora, nata Cavegn. Da ses cars geniturs ha la cara defuncta Tina artau treis forzas decisivas per la veta terrestra, numnadamein: ina cardientscha profunda, la gronda vertid da carezar il proxim e la carezia intima per la cara patria, cun la quala ella ha mantenui ina buna relaziun entochen sia davosa fladada.

El hotel dalla Cruna a Sedrun ha la preziada defuncta empriu d'enconuscher las differentas qualitads da tuttas specias da carstgauns – leghers e serius, melancolics e sanguinichers. Ella ei stada in exemplu da carezia per mintga hosp. Sia noblezia, mo era sia seriusadad personificheschan il bien caracter della Tina. Senza stravagar ei la defuncta stada ina petga da grond sustegn per ses renomai frars Lucas e Cristian sil sectur dalla hotellaria.

Suenter haver frequentau las scolas popularas a Sedrun seperfecziunescha la Tina vinavon. Cun oreifer success termenescha ella igl emprendissadi da cuschiniera a Cuera el hotel dalla Steila. Allura suondan onns da scolaziun ad Arosa ed a casa cun geniturs e fargliuns. Denter la sesiun frequentava ella differents cuors da perfecziun tier ses frars el restaurant Hegibach a Turitg ed el buffet dalla staziun a Rapperswil. Aschia ha la defuncta acquistau tut las habilitads per menar a direger in hotel. Ella vess daveras buca giu gronda breigia e fadiglia d'anflar ina buna piazza ella bassa. Mo la carezia viers geniturs e fargliuns lai turnar Tina a casa per s'engaschar el menaschi da famiglia. La Cruna ei per la defuncta in magnet cun in sulet pol. Cun capienttscha semetta ella el menaschi che flurescha stupent.

Mo las vias dil carstgaun ein nunperscrutablas. In di arriva in chef da cuschina si dalla Turgovia, in cuschinier d'emprema classa, che la Tina haveva gia empriu d'enconuscher pli baul. Ins di: «che la



carezia percuori era il magun». E quei ha era la cara defuncta observau. Igl onn 1947 marida la Tina il valent cuschinier Hugo Seiler. Ensemens cun il frar e quinu Cristian Berther-Rhyner meinan els vinavon la fatschenta tochen igl onn 1958.

Hugo Seiler, in carezau mariu, ha denton problems linguistics e las teissas spundas e greppas dalla biala val Tujetsch smacca il cor. El lai encrescher per la biala patria allas rivas dil lag da Constanza. Igl onn 1958 serenda el cun sia fideivla consorta a Romanshorn. Per la Tina eisi buca stau ina leva decisio. A Romanshorn surprindan els il restaurant «Landhaus» e lavuran leu cun carezia vicendeivla duront varga 12 onns. En quei restaurant dalla diaspora ha la defuncta tschentau e fermau encounter veglia da convischins la crusch cun il Cristus sin in plaz veseivel. Quei schabett e quella profunda cardientscha han augmentau la stema dils hosps viers quei ventireivel pèr. Giuven e vegl han prest rendiu il ver e dueivel respect als buns conjugals.

Duront ils onns da serasontga en lur casetta ad Uttwil, allas rivas dil lag, han la Tina e siu um visitau pliras gadas la cara patria tuatschina. Il «schar encrescher», la malsogna da tuts Romontschs, ha era la cara defuncta stuiu sentir entochen la davosa fladada. Tgi ch'enconuscha quella buna e nobla femna vegn a salvar ella en cuzzeivla memoria. La buontad, la carezia, la noblezia e la profunda cardientscha ein vertids che cuozzan semper – lunsch sur sia fossa a Romanshorn. Il Segner detti ad ella la pagaglia meritada ed il ruaus perpeten.

A siu carezau mariu Hugo exprimin nus nossia cordiala condollientscha ed ils megliers saluds da Sedrun. Era las famiglias en malencurada vegli il bien Diu consolar.  
L.J.